



Politička organizacija građana "Naša stranka"
Branilaca Sarajeva 5/1, 71 000 Sarajevo
Telefon: 033 551 225; Fax: 033 551 226
E-mail: nasastranka@nasastranka.ba
Web: www.nasastranka.ba

Sarajevo, 29.03.2016.

Edin Forto
Zastupnik Naše stranke u Skupštini Kantona Sarajevo

Dostaviti:
Predsjedavajuća Skupštine Kantona Sarajevo
Ministarstvo komunalne privrede i infrastrukture KS

Poštovani,

U skladu sa članom 151. i 152. Poslovnika Skupštine Kantona Sarajevo, Edni Forto, zastupnik Naše stranke u Skupštini Kantona Sarajevo dostavlja slijedeće:

**AMANDMANE NA PRIJEDLOG ZAKONA O
O KOMUNALNOJ ČISTOĆI**

Amandman I

U članu 14. stav 2. mijenja se i glasi:

“Materijal, koji ostane poslije rušenja ili građenja objekta i završnih radova na gradilištu, mora se ukloniti u roku od 24 sata od časa kada je završeno rušenje ili građenje objekta, a mjesto rušenja, odnosno građenja, mora se ostaviti uredno i čisto.”

Obrazloženje:

Kao i poslije rušenja, također poslije građenja objekta i drugih radova na gradilištu ostaje materijal koji bi bilo neophodno ukloniti kako bi mjesto rušenja, odnosno, građenja bilo uredno i čisto 24 sata od završetka radova.

Amandman II

U Članu 15. iza tačke b) dodaje se nova tačka c) koja glasi:

“c) odlaganje kućnog otpada u ulične korpe za otpatke,”

Dosadašnje tačke c), d), e), f), g), h), i), j), k), l), m), n), o), p), r), s), t), u), v) postaju d), e), f), g), h), i), j), k), l), m), n), o), p), r), s), t), u), v), z).

U istom članu tačka i) mijenja se i glasi:

„i) polijevanje ili ispuštanje na javne površine prljavih i masnih tečnosti, sredstava za zaštitu drva, zaštitu biljaka, dezinfekciju, dezinfekciju i deratizaciju, baza, kiselina, boja, lakova, rastvarača, sredstava za skidanje hrđe, boje ili laka, antifrizi, ljepila, fotohemikalija, sredstava za održavanje bazena, maziva, ulja, tekućih goriva, fiksira i razvijača, lijekova i drugog farmaceutskog otpada, kreča, životinjskog izmeta i fekalija,“

U istom članu, iza tačke k) dodaje se nova tačka l) koja glasi:

„l) odlaganje na javne površine starih baterija, akumulatora, uljnih filtera, boca pod pritiskom, termometara sa živom, fluorescentnih cijevi i drugog otpada koji sadrži živu, municije, pirotehničkih sredstava, ionizatora, detektora dima i plinova i drugih električnih i elektroničkih uređaja koji sadrže opasne komponente,“

Dosadašnje tačke l), m), n), o), p), r), s), t), u), v), z) postaju m), n), o), p), r), s), t), u), v), z), aa).

U istom članu, iza tačke v) dodaje se nova tačka z) koja glasi:

„z) uništavanje i oštećivanje posuda za otpad.“

Dosadašnje tačke z), aa) postaju tačke aa), bb).

Obrazloženje:

Iza tačke b) dodata je nova tačka c) iz razloga što je u njoj opisana aktivnost česta pojava na ulicama Kantona Sarajevo. Ulične korpe za otpatke predviđene su za komunalni otpad sa javnih površina i manje su zapremine. Kada se u njih odlože veće količine kućnog otpada, za čije odlaganje su

predviđeni kontejneri i druge posude veće zapremine, isti zauzme čitavu zapreminu ulične korpe, što onda doprinosi neurednom i nečistom izgledu ulica i zahtijeva češće pražnjenje uličnih korpi.

Tačka i) izmijenjena je u potpunosti iz razloga što su mnoga fizička i pravna lica sa područja Kantona Sarajevo potencijalni odlagači pobrojanih vrsta otpada, s obzirom da se radi o proizvodima koje mnogi svakodnevno koriste. Riječ je o proizvodima sa svojstvima opasnog otpada, koja mogu štetno djelovati na čovjeka i njegovu okolinu, poput svojstava eksplozivnosti, reaktivnosti, zapaljivosti, nadražljivosti, toksičnosti, infektivnosti, kancerogenosti, mutagenosti, teratogenosti, ekotoksičnosti, zatim svojstava oksidacije, nagrizanja i otpuštanja otrovnih plinova hemijskom reakcijom ili biološkom razgradnjom.

Iz istog, iznad navedenog razloga, dodata je nova tačka l) koja se odnosi na kruti otpad sa svojstvima opasnog otpada.

Na kraju, dodata je nova tačka bb) iz razloga što se aktivnost opisana u navedenoj tački pojavljuje kao čest prekršaj.

Amandman III

U članu 16. iza riječi "otkloniti" dodaju se riječi "i tako javnu površinu vratiti u prvobitno stanje."

Obrazloženje:

Bitno je naglasiti da uklanjanje eventualnih oštećenja i zaprljanosti, nastalih pri korištenju javnih površina, kao i nepogoršavanje izgleda površine, podrazumijeva da se javna površina i prije i nakon korištenja mora nalaziti u istom stanju.

Amandman IV

U članu 26, stavu 3. iza riječi "gradski odnosno općinski organ nadležan za komunalne poslove" dodaju se riječi "uz prethodno pribavljeno stručno mišljenje Zavoda za planiranje razvoja Kantona Sarajevo i okolišnu dozvolu Federalnog ministarstva okoliša i turizma."

Obrazloženje:

Iako jedinice lokalne samouprave mogu, na osnovu prostorno-planske dokumentacije odrediti pozicije reciklažnih dvorišta, problem se može javiti kod nepostojanja ove dokumentacije. Isti bi se pak dao riješiti pribavljanjem Stručnog mišljenja Zavoda za planiranje razvoja Kantona Sarajevo, u skladu sa članom 81. Zakona o prostornom uređenju Kantona Sarajevo i okolišne dozvole koju dodjeljuje Federalnog ministarstva okoliša i turizma.

Amandman V

OKUŠALI KAKO
STRUČNE INTERVENCIJE

Član 57. stav (4) mijenja se i glasi:

„Osnovicu za utvrđivanje visine cijene iz st. (1) ovog člana je broj članova domaćinstva korisnika stambenog prostora.“

U istom članu iza stava (4) dodaje se stav (5) koji glasi: „Osnovica za utvrđivanje visine cijene iz st. (2) i (3) ovog člana je kvadratni metar (m²) korisne izgrađene površine.

Stavovi (5), (6), (7), (8), (9), (10) postaju stavovi (6), (7), (8), (9), (10), i (11).

Obrazloženje:

Smatramo da kvadratni metar nije pravilna osnovica za određivanje visine cijene usluge prikupljanja, odvođenja i deponovanja otpadaka iz stambenih zgrada i stanova, iz razloga što jedna osoba koja sama živi u više kvadrata stambenog prostora plaća višu cijenu usluge nego više osoba koje žive u manje kvadrata stambenog prostora.

Amandman VI

U članu 67. iza stava (1) dodaje se novi stav (2) koji glasi:

“(2) Ako, na osnovu zaprimljene prijave od strane građana, utvrdi da postoji osnovana sumnja izvršenja radnje suprotno odredbama ovog zakona i propisima donesenim na osnovu njega, komunalni redar može sačiniti zapisnik ili službenu zabilješku.”

Dosadašnji stav (2) postaje stav (3).

Obrazloženje:

Na ovaj način se ostavlja mogućnost savjesnim građanima da, uz odgovarajuće dokaze (foto ili video materijal, naprimjer), izvrše prijavu kršenja odredbi ovog zakona, a komunalnom redaru daje se za pravo da na osnovu tih prijava, nakon što utvrdi je li sumnja osnovana, sačini zapisnik ili službenu zabilješku.

Amandman VII

U članu 68. dodaje se novi stav (2) koji glasi:

“(2) Ako se komunalnom redaru ne dopušta pristup javnoj površini radi utvrđivanja činjeničnog stanja, u slučaju postojanja opravdane sumnje izvršenja radnje suprotno odredbama ovog zakona i propisima donesenim na osnovu njega, komunalni redar ovlašten je zatražiti nalog suda i asistenciju nadležnih organa Ministarstva unutrašnjih poslova Kantona Sarajevo radi pristupa površini u svrhu utvrđivanja činjenica.”

Obrazloženje:

U slučaju da postoji opravdana sumnja kršenja odredbi ovog zakona, a komunalnom redaru se fizički ili na neki drugi način onemogućava pristup javnoj površini na kojoj je možda izvršena radnja suprotno odredbama ovog zakona, komunalnom redaru se ovako stvara mogućnost da, uz sudski nalog i asistenciju nadležnih organa Ministarstva unutrašnjih poslova Kantona Sarajevo ipak pristupi površini u svrhu utvrđivanja činjenica.

S poštovanjem,



Edin Forto
Zastupnik Naše stranke u Skupštini KS

